

Henti panggilan 'Indon': Khairiy

B.H 9.1.2008 ms 6

Istilah dianggap menghina, boleh jatuhkan maruah rakyat negara jiran

SHAH ALAM: Rakyat diminta berhenti memanggil warga Indonesia di negara ini dengan panggilan 'Indon' kerana istilah atau gelaran itu dianggap menghina dan menjatuhkan maruah rakyat negara jiran itu.

Naib Ketua Pemuda Umno, Khairy Jamaludin, berkata beliau menerima banyak bantahan pemimpin politik dan pemimpin belia yang kurang senang dengan panggilan itu dan digunakan secara meluas termasuk media cetak dan elektronik.

Khairy berkata, rakyat Indonesia tersinggung dengan panggilan itu yang didakwa seolah-olah rakyat Malaysia memandang rendah serta tidak menghormati mereka sebagai jiran serumpun yang berkongsi banyak persamaan.

"Jika kita tahu panggilan ini menyakitkan hati mereka (rakyat Indonesia), saya percaya kita perlu berhenti menggunakan panggilan itu.

"Saya berharap media massa yang menjadi saluran untuk mempopularkan panggilan itu dapat memenuhi permintaan rakyat Indonesia," kata-

nya pada sidang akhbar selepas menjadi pembicara khas pada hari terakhir Dialog Malindo 2008, di sini semalam.

Khairy berkata, rakyat Malaysia juga akan marah jika dipanggil gelaran yang menyakitkan hati oleh negara jiran dan permintaan supaya menghentikan penggunaan gelaran itu tidak dipedulikan.

Sementara itu, wakil Ketua Umum Komite Nasional Pemuda Indonesia (KNPI), Hamka M Noor, berkata panggilan Indon yang popular di negara ini bagi merujuk kepada rakyat Indonesia termasuk Tenaga Kerja In-

“ *Jika kita tahu panggilan ini menyakitkan hati mereka, saya percaya kita perlu berhenti gunakan panggilan itu”*

Khairy Jamaludin
Naib Ketua Pemuda Umno

donesia (TKI) dianggap merendahkan taraf rakyat negara itu.

Katanya, panggilan itu tidak pernah wujud di negara berkenaan dan media negara ini yang bertanggungjawab mempopularkannya perlu berhenti dan menggantikannya dengan perkataan Indonesia.

Hamka berkata, panggilan itu sangat sensitif di kalangan rakyat Indonesia terutama belia kerana ia berkait rapat dengan maruah rakyat di sebuah negara berdaulat dan merdeka.

Sebelum itu, Khairy ketika dialog itu berkata, Malaysia dan Indonesia yang berkongsi banyak bersamaan sejarah dan sosio budaya tidak perlu campur tangan negara asing termasuk Amerika Syarikat bagi menyelesaikan perselisihan faham.

Katanya, kedua-dua negara yang mempunyai hubungan mesra seperti abang adik itu boleh menyelesaikan salah faham secara baik hasil kerjasama erat yang sudah wujud sekian lama.

Tiga isu utama menimbulkan tidak puas hati golongan muda kedua-dua negara yang kerap menjadi topik hangat di internet dan blog ialah isu kedaulatan, TKI dan sosio budaya.



HUBUNGAN AKRAB: Khairy beramah mesra dengan belia dari Indonesia pada Dialog Malindo 2008, di Shah Alam semalam.